

Blagodati mjeseca ša'bana



Hvala Allahu koji nas je počastio čašću da dočekamo osmi mjesec lunarnog kalendara - mubarek ša'ban. Ovaj mjesec je jedan od odabranih mjeseci koji se često spominje i ističu njegove vrijednosti. Prije nego spomenemo vrijednosti i djela koja je lijepo raditi u ovom mjesecu potrebno je spomenuti da su tri mjeseca - redžeb, ša'ban i ramazan, mjeseci čije se vrline i vrijednosti posebno ističu. U predajama koje se prenose od islamskih velikana opetovano se ova tri mjeseca izdvajaju i ističe se da su ti mjeseci pogodna prilika za ibadet i samoizgradnju. Poslanik s.a.v.s.o ovim mjesecima kaže: „Znajte da je redžeb Allahov mjesec, ša'ban moj mjesec, a ramazan mjesec moga ummeta.“ Prema tome, ša'ban je mjesec našega Poslanika, s.a.v.s. S obzirom da ša'ban dolazi prije mubarek ramazana preporučuju se različiti ibadeti u ovom mjesecu kako bi se smanjili grijesi i nečistoće, te da bi se duša bolje pripremila za prisustvo Allahovoj trpezi u mubarek ramazanu. U historiji se spominje da je hazreti Alija, neka je mir na njega, prvog dana ša'bana vidio grupu kako sjedi u mesdžidu i vodi neobavezan razgovor. On im se obrati: *„Ostavite se takve priče! Danas je prvi dan ša'bana i ovaj mjesec je nazvan ša'banom jer se nalazi u centru različitih vrsta dobročinstava. Razne vrste dobročinstava koje krase ovaj mjesec su namaz, post, zekat, naređivanje dobro a zabranjivanje zla, dobročinstvo roditeljima i komšijama, pomaganje siromašnih i popravljjanje međuljudskih* „odnosa itd

Nakon toga Imam Alija, neka je mir na njega, prenosi riječi Poslanika s.a.v.s. koji je rekao: *„Prvi dan mjeseca ša'bana Allah dž.š. naređuje da se otvore vrata dženneta. Tako mi Boga, koji me je poslao kogod toga dana učini bilo koje dobro djelo zakačio se na jednu od grana džennetskog stabla „tuba“, koje će ga vući ka džennetu.“ Nakon toga on je naveo primjere kako se može okačiti o grane drveta tuba: „Kogod pored obaveznih namaza ovoga dana klanja nafila namaze ili zaposti ili pomiri bračne drugove, roditelje i djecu ili rođake i komšije zakačio se za jednu od grana tuba drveta. Također, onaj ko oprosti dug, pobrine se za jetima, spriječi napad na čast neke osobe i onaj ko uči Kur'an i zahvaljuje na Allahovim blagodatima, ili posjeti*

bolesnika, čini dobročinstvo roditeljima ili uradi bilo kakvo drugo dobro djelo zakačio se za jednu od grana tuba drveta.” Poslanik s.a.v.s. u ovom hadisu je jasno definirao puteve ibadeta i samoizgradnje, te služenje stvorenjima. Naravno, ove stvari se preporučuju da se čine tokom cijele godine, a mjesec ša'ban može biti početak novog pokreta ka čistoti i dobroti. Na osnovu onoga što se prenosi u nekim rivajetima Poslanik s.a.v.s. je jedne godine prilikom početka ovoga mjeseca u svom govoru ljudima pojasnio veličinu i vrijednost ovog mjeseca. U djelu „Biharul-envar“ navode se dijelovi njegovih riječi: *„Ša'ban je častan mjesec i to je moj mjesec. Nosioci arša ovaj mjesec ubrajaju u velike mjesece. To je mjesec u kojem, kao i mjesecu ramazanu, Allah povećava opskrbu Svojih robova i ukrašava se džennet, a taj mjesec je mjesec ša'ban, jer se u tom mjesecu blagodati vjernika dijele i u tom mjesecu se djela umnogostručavaju, a dobro djelo uvećava za 70 puta.”*

Također, u drugom hadisu u djelu „Risailu-ši'e“ i „Biharul-envar“ govori se o vrijednostima ša'bana: „Allah se kune Svojim Bićem da, neće uskratiti Svoju milost, onome ko u ovom mjesecu kod Njega potraži utočište i od Njega zatraži nešto.”

Preporučivanje određenih brojnih djela u mjesecu ša'banu jasno ukazuje da je ovaj mjesec pogodna prilika za tevbu, traženje oprosta i približavanja Uzvišenom Allahu. Jedno od djela koje se preporučuje u mjesecu ša'banu je post. Imam Sadik, neka je mir na njega, kaže: „Poslanik s.a.v.s. kada god bi ugledao mlađak mjeseca ša'bana telalu bi govorio da u Medini uzvikuje: Hej stanovnici Medine! Znajte da je ša'ban moj mjesec pa neka se Allah smiluje onome ko bude uz mene u mom mjesecu, tojest neka posti u ovom mjesecu.”

Poslanik s.a.v.s. i velikani u islama su preporučivali da se u mjesecu ša'banu puno čini tevba i moli Allaha za oprost grijeha. Najbolja od svih dova i zikrova u ovom mjesecu je istigfar. I kogod svakoga dana ovoga mjeseca 70 puta istigfar učini isto je kao da je 70 hiljada puta u drugim mjesecima istigfar činio. Također, salavat i selam na Poslanika i njegovu čistu porodicu u ovom mjesecu je zikr kojeg su preporučivali velikani islama. Naravno, samo jezikom spominjati ove stvari nije dovoljno, jer je potrebno duboko razmišljati o značenju svega toga i srcem prihvatiti sve ono što ove dove u sebi nose. U hladu ovih značajnih ibadeta moguće je glačati biser ljudskoga bića. Dati sadaku u ovom mjesecu pohvalno je pa makar to bilo u vrijednosti pola hurme. Od Poslanika s.a.v.s. se prenosi: „Kogod u ša'banu sadaku dadne Allah tu sadaku uveća...do te mjere da ta sadaka, onome ko ju je dao na Sudnjem danu, dođe velika kao brdo Uhud.”

Još jedno djelo koje se preporučuje u ovom mjesecu i koje vjerski velikani potenciraju jeste učenje munadžata (dova) mjeseca ša'bana. Poznati munadžati mjeseca ša'bana prenose se od hazreti Alije, neka je mir na njega. Ti munadžati su tako blagi i srcu prijatni da vjernici, upravo

zbog njih, s nestrpljenjem iščekuju mjesec ša'ban. U tim munadžatima spominju se prelijepe .rečeničke konstrukcije koje govore o odnosu prema Bogu i izražavanju pokornosti pred Njim

U jednom dijelu učimo: „Gospodaru moj poslušaj moju dovu kada god je uputim...pogledaj me kada Ti se obraćam. Gospodaru ako me udaljiš od Sebe pa ko će mi opskrbu darovati?! Ako me Ti poniziš pa ko će me pomoći?! Gospodaru moj učini me od onih koji se odazovu čim ih pozoveš i učini me od onih koji se neprestano sjećaju Tebe i ne krše svoje obaveze prema Tebi i uvijek su ti zahvalni. Gospodaru moj poveži me s nurom časti Tvoje da bih te bolje upoznao i kako bih se od svega što nije Ti, odvojio.“

U mjesecu ša'banu nalaze se dani i noći koji povećavaju njegove vrijednosti. Noć polovine mjeseca ša'bana treba smatrati najvažnijom noći u ša'banu i možda najboljom noći nakon noći

Kadra. Od Poslanika s.a.v.s. se prenosi da je o vrijednostima ove noći rekao: *„Spavao sam u noći polovine ša'bana kada mi je došao Džibril i rekao: O Muhammede, zar spavaš u ovoj noći? Rekao sam: A kakva je ovo noć? Džibril reče: Ova noć je noć sredine ša'bana. O Muhammede ustaj! Nakon toga, podigao me iz postelje i rekao: Podigni svoju glavu i pogledaj u nebesa. Ovo je noć u kojoj se otvaraju vrata nebesa i vrata Allahove milosti i zadovoljstva. O, Muhammede kogod ovu noć do jutra provede uz tekbire, tesbih, dove, namaz, učenje Kur'ana, činjenje dobročinstva i istigfar, njegova kuća biće džennet.“*

Kada je Imam Bakir, neka je mir na njega upitan o vrijednostima noći sredine ša'bana, rekao je: *„Ta noć je najvrijednija noć nakon noći kadra i to je noć u kojoj Allah dž.š. daruje Svoje darove robovima i oprašta im Svojom plemenitošću. Zato trudite se u ovoj noći približiti se Bogu. Zaista je ovo noć za koju je Bog, Sebe obavezao, da u njoj neće vratiti prazne ruke bilo koga ko u njoj nešto zatraži...“*

Prema tome, u ovoj noći je potrebno cijelu noć provesti doveći i obraćajući se Allahu. U noći sredine ša'bana desilo se i posebno, veličanstveno rođenje. U zoru jedne ovakve noći 255-e godine po hidžri rođen je hazreti Mehdi. Hazreti Mehdi je obećani spasitelj koji će svojim ustankom cijeli svijet učiniti mjestom pravednosti. Pored hazreti Mehdiya i još dva Poslanikova potomka, poput Imama Husejna i Imama Sedžada, neka je mir na njih, rođeni su u mjesecu ša'banu. Također, u ovom mjesecu je rođen mubarek hazreti Ebul-Fazl el Abbas, sin imama Alija.

U postu posljednja tri dana mjeseca ša'bana krije se posebna vrijednost, koju nikako ne bi trebalo propustiti. Nadamo se da će nas Uzvišeni Allah uputiti u ovom mubarek mjesecu i u .tom kontekstu, od vas se opraštamo uz molbu da nas ne zaboravite u svojim dovama